

四庫全書

史部

欽定四庫全書

魏書卷十一

齊

魏

收

撰

帝紀第十一

前廢帝廣陵王紀

後廢帝安定王紀

出帝平陽王紀

前廢帝諱恭字修業廣陵惠王羽之子也母曰王氏少

端謹有志度長而好學事祖母嫡母以孝聞正始中襲爵延昌中拜通直散騎常侍神龜中進兼散騎常侍正光二年正常侍領給事黃門侍郎帝以元叉擅權遂稱疾不起久之因託瘖病五年執除金紫光祿大夫加散騎常侍建義元年除儀同三司王既絕言垂將一紀居於龍花寺無所交通永安末有白莊帝者言王不語將有異圖民間遊聲又云有天子之氣王懼禍逃匿上洛尋見追躡執送京師拘禁多日以無狀獲免及莊帝崩

余朱世隆等以元暉疎遠又非人望所推以王潛嘿晦
身有過人之量將謀廢立恐實不語乃令王所親申其
意且兼迫脅王遂答曰天何言哉世隆等大悅春三月
己巳暉進至邛南世隆等奉王東郭之外行禪讓之禮
羣臣上表曰否泰浚時殷憂啓聖故六飛在御三石興
符伏惟陛下運屬千齡智周萬物獨昭繫象妙極天人
寶歷有歸光宅攸屬而將安獨善不務兼濟靈命徘徊
幽明載佇伏願時順謳謠念茲宗祏用捨勞疾允答人

神王答曰自量眇身是以讓執然王公勤至不可拒違
今敬承所陳惟愧弗堪負荷耳太尉公余朱度律奉進
璽綬袞冕之服乃就輅車百官侍衛入自建春雲龍門
昇太極前殿羣臣拜賀禮畢登閭闔門詔曰朕以寡薄
撫臨萬邦思與億兆同茲慶泰可大赦天下以魏為大
魏改建明二年為普泰元年其稅市及稅鹽之官可悉
廢之百雜之戶貸賜民名官任仍舊天下調絹四百一
疋内外文武普汎四階合叙未定第者亦沾級除名免

官者特復本資品封依舊潁川王俞朱兆彭城王俞朱
仲遠隴西王俞朱天光樂平王俞朱世隆常山王俞朱
度律車騎大將軍儀同三司齊獻武王都督斛斯椿下
軍士普汎六級庚午詔曰朕以眇身臨王公之上夕惕
祇懷若履冰谷賴七廟之靈百辟忠誠之舉庶免墜歿
夫三皇稱皇五帝云帝三代稱王迭沖挹也自秦之末
競為皇帝忘負乘之深殃垂貪鄙於萬葉子今稱帝已
為褒矣可普告令知是月鎮遠將軍清河崔祖螭聚青

州七郡之衆十餘萬人圍東陽幽州刺史劉靈助起兵於薊撫軍將軍金紫光祿大夫兼侍中河北大使高乾邕及弟平北將軍通直散騎常侍敖曹率衆夜襲冀州執刺史元嶷殺監軍孫白鷄共推前河內太守封隆之行州事三月癸酉封長廣王曄為東海王詔太師驃騎大將軍青州刺史魯郡王肅還為太師特進車騎大將軍沛郡王欣為太傅司州牧改封淮陽王驃騎大將軍開府儀同三司徐州刺史彭城王劼朱仲遠驃騎大將

軍儀同三司雍州刺史隴西王允朱天光並為大將軍
柱國大將軍并州刺史潁州王允朱兆為天柱大將軍
驃騎大將軍儀同三司左衛將軍大都督晉州刺史平
陽郡開國公齊獻武王封渤海王增邑五百戶特進車
騎大將軍清河王亶為儀同三司侍中太傅驃騎大將
軍開府儀同三司尚書令樂平王允朱世隆為太保開
府前司徒公長孫稚為太尉公錄尚書事侍中驃騎大
將軍開府儀同三司趙郡王諶為司空公稚固辭尋除

驃騎大將軍開府儀同三司丙子帝引見尚書右僕射
元羅及皇宗於顯陽殿勞勉之丁丑加驃騎大將軍北
華州刺史公孫畧儀同三司己卯詔右衛將軍賀拔勝
并尚書一人募伎作及雜戶從征者正入出身皆授實
官私馬者優一大階庚辰以侍中衛將軍咸陽王坦衛
將軍尚書左僕射南陽王寶炬侍中征東將軍平陽王
修並儀同三司乙酉詔簡北來及在京二官員外刺置
者己丑以持節驃騎將軍涇州刺史賀拔岳為儀同三

司岐州刺史使持節車騎大將軍渭州刺史侯莫陳悅
為儀同三司秦州刺史庚寅詔天下有德孝仁賢忠義
志信者可以禮召赴闕不應召者以不敬論丙申劉靈
助率衆次於安國城定州刺史侯淵破斬之傳首京師
戊戌以使持節侍中車騎大將軍斛斯椿侍中衛將軍
元受並特進儀同三司詔曰頃官方失序仍令沙汰定
員簡刺已有判決退下之徒微亦可愍諸在簡下可特
優一級皆授將軍預參選限隨能補用是春冠軍將軍

南青州刺史茹懷朗使其部將何寶率步騎三千擊蕭衍守將於琅邪擒其尚書左僕射儀同三司雲麾將軍徐兗二州刺史劉相如夏四月癸卯幸華林都亭燕射班錫有差太樂奏伎有倡優為愚癡者帝以非雅戲詔罷之士子有事於太廟癸丑詔以齊獻武王為使持節侍中都督冀州諸軍事驃騎大將軍開府儀同三司大都督東道大行臺冀州刺史驃騎大將軍安定王佖朱智虎為開府儀同三司肆州刺史乙卯以右衛將軍賀

拔勝武衛將軍大野拔並為儀同三司己未帝於顯陽
殿簡試通直散騎常侍散騎侍郎通直郎剡員非才他
轉之癸亥隴西王侖朱天光大破宿勤明達擒送京師
斬之丙寅以侍中驃騎大將軍侖朱彥伯為司徒公詔
有司不得復稱偽梁罷細作之條無禁鄰國往還詔員
外諫議大夫步兵校尉奉車都尉羽林監給事中積射
將軍奉朝請殿中將軍宮門僕射殿中司馬督治禮郎
十一官得俸而不給力老合外選者依常格其未老欲

外選者聽解其七品以上朔望入朝若正員有闕隨才
進補前員外簡退優階者追之稱事簡下者仍優一級
先是南陽太守趙修延執刺史李琰之五月丙子荊州
城民斬修延送首還推琰之為刺史余朱仲遠使其都
督魏僧勗等討崔祖螭於東陽擒斬之六月庚申齊獻
武王以余朱逆亂始興義兵於信都西定殷州斬其刺
史余朱羽生命南趙郡太守李元忠為刺史鎮廣阿癸
亥帝臨顯陽殿親理冤訟戊辰以使持節驃騎大將軍

開府公朱弼為儀同三司秋七月壬申公朱世隆等害
前太保楊椿前司空公楊津及其家丙戌司徒公朱
彥伯以旱遜位戊子除彥伯侍中開府儀同三司庚寅
以侍中太保開府尚書令樂平王公朱世隆為儀同三
司位次上公八月庚子詔隴西王公朱天光下文武討
宿勤明達者汎三級潁川王公朱兆率步騎二萬出井
陘趨殷州李元忠棄城還信都丙午常山王公朱度律
彭城王公朱仲遠等率眾出抗義旗九月丁丑以侍中

驃騎將軍盧同驃騎大將軍杜德車騎大將軍橋寧並
為儀同三司己卯以使持節都督東道諸軍事兼尚書
令東道大行臺彭城王俞朱仲遠為太宰庚辰加使持
節大將軍都督關中諸軍事兼尚書令西道大行臺隴
西王俞朱天光為大司馬驃騎大將軍青州刺史開府
儀同三司穆紹薨癸巳追尊皇考為先帝皇妣王氏為
先太妃封皇弟永業為高密王皇子子恕為渤海王冬
十月壬寅齊獻武王推渤海太守元朗即皇帝位於信

都

二年春三月齊獻武王敗尔朱天光等於韓陵夏四月
辛巳齊獻武王與廢帝至邳山使魏蘭根慰諭洛邑且
觀帝之為人蘭根忌帝雅德還致毀謗竟從崔悛議廢
帝於崇訓佛寺而立平陽王修為帝帝既失位乃賦詩
曰朱門久可患紫極非情翫顛覆立可待一年三易換
時運正如此唯有脩真觀太昌初帝殂於門下外省時
年三十五出帝詔百司赴會大鴻臚監護喪事葬用王

禮加以九旒鑾輅黃屋左纛班劍百二十人二衛羽林
備儀衛

後廢帝諱朗字仲哲章武王融第三子也母曰程氏少
稱明悟永安二年為肆州魯郡王後軍府錄事參軍儀
同開府司馬元暉之建明二年正月戊子為冀州渤海
太守及齊獻武王起義兵將誅暴逆乃推戴之冬十月
壬寅即皇帝位於信都城西昇壇焚燎大赦稱中興元
年文武百官普汎四級以齊獻武王為侍中丞相都督

中外諸軍事大將軍錄尚書事大行臺增邑三萬戶以
魚侍中撫軍將軍河北大使高乾邕為侍中司空公前
平北將軍通直散騎常侍高敖曹為驃騎大將軍儀同
三司冀州刺史以終其身以前刺史元嶷為儀同三司
已酉余朱度律余朱仲遠斛斯椿賀拔勝賈顯智次於
陽平將抗義師齊獻武王縱反間構之遂與余朱兆相
疑敗散而還辛亥齊獻武王大破余朱兆於廣阿虜其
卒五千餘人詔將士汎五級留守者二級詔征東將軍

吏部尚書封隆之為使持節北道大使隨方處分十有
一月己巳詔曰王度初開曩倫方始所班官秩不改舊
章而無識之徒因茲僥倖謬增軍級虛名顯位皆言前
朝所授理難推抑自非嚴為條制無以防其偽竊諸有
虛增官號為人發紕罪從軍法若入格檢覆無名者退
為平民終身禁錮庚辰齊獻武王率師攻鄴城是年南
兗城民王乞德逼前刺史劉世明以州降蕭衍衍使其
將元樹入據譙城

二年春正月壬午拔鄴擒刺史劉誕詔諸將士汎四級
封侯增邑九十七人各有差等癸未詔曰自中興草昧
典制權輿郡縣之官率多行督假有正者風化未均眷
彼周餘專為漁獵朕所以夙興夜寐有惕於懷有司明
加糾罰稱朕意焉二月辛亥上孝莊皇帝諡曰武懷皇
帝甲子以齊獻武王為大丞相柱國大將軍太師增封
三萬戶并前為六萬戶三月丙寅以齊文襄王起家為
驃騎大將軍儀同三司丙子以侍中車騎大將軍尚書

左僕射孫騰為驃騎大將軍儀同三司丁丑車駕幸鄴
乙酉詔文武家屬自信都赴鄴城閏月乙未以安北將
軍光祿大夫博野縣開國伯尉景為驃騎大將軍儀同
三司丙申以衛將軍金紫光祿大夫庫狄干為車騎大
將軍儀同三司壬寅余朱天光兆度律仲遠等屯於汴
水之南癸丑齊獻武王出頓紫陌庚申余朱兆率輕騎
三千夜襲鄴城叩西門不剋退走壬戌齊獻武王大破
余朱天光等四胡於韓陵前廢帝鎮軍將軍賀拔勝徐

州刺史杜德於陳降。余朱兆走趣并州。仲遠奔東郡。天
光度律將赴洛陽。大都督斛斯椿賈顯智倍道先還。夏
四月甲子朔。椿等據河橋懼罪。自劾。尋擒天光度律於
河橋西北。大行臺長孫稚都督賈顯智等率騎入京師。
執余朱世隆。彥伯斬於都街。囚送天光度律於齊獻武
王辛未。前廢帝驃騎大將軍行濟州事侯景據城降。仍
除儀同三司。兼尚書僕射。南道大行臺濟州刺史。甲戌
以車騎將軍尚書右僕射魏蘭根為驃騎大將軍。儀同

三司乙亥以車騎大將軍儀同三司中軍大都督高盛
兼尚書僕射北道行臺隨機處分余朱仲遠奔蕭衍青
州刺史余朱弼為其部下馮紹隆所殺傳首京師丙子
前廢帝安東將軍辛永右將軍建州大都督張悅舉城
降辛巳車駕至河陽遜位於別邸太昌元年五月封安
定郡王邑一萬戶後以罪殂於門下外省時年二十永
熙二年塋於鄴西南野馬岡

出帝諱修字孝則廣平武穆王懷之第三子也母李氏

性沉厚少言好武事始封汝陽縣開國公拜通直散騎
侍郎轉中書侍郎建義初除散騎常侍尋遷平東將軍
兼太常卿又為鎮東將軍宗正卿永安三年封平陽王
普泰初轉侍中鎮東將軍儀同三司兼尚書右僕射又
加侍中尚書左僕射中興二年夏四月安定王自以疎
遠未允四海之心請遜大位齊獻武王與百寮會議僉
謂高祖不可無後乃共奉王戊子即帝位於東郭之外
入自東陽雲龍門御太極前殿羣臣朝賀禮畢昇閭闔

門詔曰否泰相公廢興互有玄天無所隱精靈弗能諭
大魏統乾德漸區寓牢籠九服旁礴三光而上天降禍
運踵多難禮樂崩淪憲章漂沒赫赫宗周翦為戎寇肅
肅清廟將成茂草胡羯乘機肆其昏虐殺君害王剗剔
海內競其吞噬之意不識醉飽之心自書契以來未有
若斯者已大丞相渤海王忠存本朝精貫白日爰舉義
旗志雪國恥故廣阿之軍貔虎奪氣鄴下之師金湯失
險近者四胡相率實繁有徒驅天下之兵盡華戎之銳

桴鼓暫交一朝盪滅元兇授首大憝斯擒揚旆濟河掃
清伊洛士民安堵不失舊章社稷危而復安洪基毀而
還構朕以託體宸極猥當樂推祇握寶圖承茲大業得
以眇身託於王公之上若涉淵水罔識攸津思與兆民
同茲嘉慶可大赦天下改中興二年為太昌元年詔前
御史中尉樊子鵠起復本官兼尚書左僕射東南道大
行臺都督儀同三司徐州史史杜德討元樹齊獻武王
上言建義之家枉為余朱氏籍歿者悉皆蠲免帝以世

易復除齊獻武王為大丞相天柱大將軍太師世襲定
州刺史增封九萬并前十五萬戶庚寅加齊文襄王侍
中開府儀同餘如故壬辰齊獻武王還鄴車駕餞別於
乾脯山五月丙申前廢帝廣陵王殂以太傅淮陽王欣
為太師封沛郡王司徒公趙郡王諶為太保侍中驃騎
大將軍開府儀同三司清河王亶儀同三司使持節侍
中驃騎大將軍開府儀同三司司州牧南陽王寶炬為
太尉公侍中太保錄尚書事長孫稚為太傅侍中驃騎

大將軍尚書左僕射元羅儀同三司尚書令驃騎大將
軍吏部尚書元世儁儀同三司戊戌以齊獻武王固讓
聽解天柱大將軍減封五萬戶餘悉如故辛丑以前司
空高乾邕復為司空公乙巳帝幸華林都亭宴羣臣班
賚有差羽林隊主唐猛突入稱慶帝以猛犯禁衛杖之
猛辭色有忤斬之階下丁未詔曰無侮惇獨事炳前經
惠此鰥寡聲留往冊朕以薄德作民父母乃眷元元寤
言增歎今理運惟新哀矜伊始如有孤老疾病無所依

歸者有司明加隱括依格賑贍又詔曰理有一準則民無覲覲法啓二門則吏多威福前主為律後主為令歷世永久實用滋章非所以準的庶品隄防萬物可令執事之官四品以上集於都省取諸條格議定一途其不可施用者當局停記新定之格勿與舊制相連務在約通無致冗滯已酉以侍中驃騎大將軍儀同三司清河王亶為司徒公庚戌詔曰頃西土年饑百姓流徙或身倚溝渠或命懸道路皆見棄草土取厭烏鳶言念於此

有警夜寐掩骼之禮誠所庶幾行瑾之義冀亦可勉其
諸有露屍令所在埋覆可宣告天下乙卯詔外內解嚴
六月癸亥朔帝於華林園納訟丙寅蠕蠕噉高麗契
丹庫莫奚國並遣使朝貢丁卯太尉公司州牧南陽王
寶炬坐事降為驃騎大將軍開府王如故歸第令羽林
衛守改謚武懷皇帝曰孝莊癸酉蠕蠕噉國遣使朝
貢戊寅詔內外百司普汎六級在京百寮加中興四級
義師將士並加軍汎六級在鄴百官三級河北同義之

州兩級河橋建義者加五級關西二級諸受建明普泰
封爵汎級優特之階悉追已卯帝臨顯陽殿納訟乙酉
高麗契丹庫莫奚國遣使朝貢丙戌以前驃騎大將軍
開府儀同三司斛斯椿還為前官詔曰間者凶權誕恣
法令變常遂立夷貊輕賦冀收天下之意隨以箕斂之
重終納十倍之征掩目捕雀何能過此朕屬念蒸黎無
忘寢食加田桑始事生業未滋若頻依常格或不周展
今歲租調且兩收一馬來年復舊辛卯以使持節衛大

將軍儀同三司尚書左僕射賈顯度為驃騎大將軍開
府儀同三司秋七月乙未詔曰頃永安馭運載育皇儲
遂錫汎階以申國慶近經普泰便爾中追今罪人既殄
舊章斯復宜迷往旨用卒前恩皇子汎二級悉可還授
文穆廟汎故宜停寢若已受者依例追之庚子以驃騎
大將軍開府南陽王寶炬為太尉公壬寅齊獻武王率
衆入自滏口大都督庫狄干入自井陘討余朱兆乙巳
齊獻武王以余朱天光余朱度律送之京師斬於都市

已酉以兼尚書左僕射東南道大行臺樊子鵠為儀同
三司庾戍詔侍中驃騎將軍左光祿大夫高隆之為使
持節驃騎大將軍儀同三司兼尚書左僕射北道行臺
率步騎十萬趨大行會齊獻武王隆之解行臺仍為大
丞相軍司齊獻武王次於武鄉公朱兆大掠晉陽北走
秀容并州平乙卯帝臨顯陽殿親理冤獄丙辰以宗師
東萊王貴平為車騎大將軍儀同三司是月夏州徙民
郭遷據宥州反刺史元嶷棄城走詔行臺侯景率齊州

刺史尉景濟州刺史蔡雋等攻討之城陷遷奔蕭衍東
南道大行臺樊子鵠大破蕭衍軍於譙城擒其鄴王元
樹及譙州刺史朱文開八月壬戌朔齊文襄王來朝燕
射班賚部下各有差丁卯以西中郎將元寧為高平王
甲戌以車騎大將軍左光祿大夫李琰之為儀同三司
庚寅以車騎將軍左光祿大夫崔秉為驃騎大將軍儀
同三司辛卯以車騎將軍右光祿大夫高岳為驃騎大
將軍儀同三司九月癸未以侍中驃騎大將軍左光祿

大夫封津為儀同三司庚子帝幸華林都亭引見元樹
及公卿百寮蕃使督將等宴射班賚各有差癸卯燕郡
開國公賀拔允進爵為王乙巳帝幸都水南過洛汭遂
至瀍澗已酉復田於北原癸丑以太師沛王欣為廣陵
王前廢帝子渤海王子恕改封沛郡王甲寅以侍中驃
騎大將軍封陰之任祥並為儀同三司以車騎大將軍
河南尹元仲景為驃騎大將軍儀同三司乙卯車駕謁
山陵丙辰蠕蠕高昌國遣使朝貢庚申以衛將軍前吏

部尚書李神儁撫軍將軍右衛將軍婁昭並為驃騎大將軍儀同三司冬十月甲子以使持節衛將軍光州刺史高仲密為車騎大將軍儀同三司丁卯以車騎大將軍左光祿大夫潘蠻為儀同三司己卯以車騎大將軍左光祿大夫高琛為特進驃騎開府儀同三司庚寅以使持節驃騎將軍肆州刺史劉貴為驃騎大將軍儀同三司十有一月甲午以車騎將軍揚州刺史斛斯敦為驃騎大將軍儀同三司丁酉日南至車駕有事於圜丘

戊戌朝會百官於太極前殿甲辰安定王朗及東海王
曄坐事死乙巳蠕蠕國遣使朝貢己酉以前太尉公汝
南王悅為侍中大司馬開府葬靈太后胡氏十有二月
丙寅以驃騎大將軍領御史中尉綦儁為儀同三司乙
亥以侍中廣平王贊為驃騎大將軍開府儀同三司丁
亥殺大司馬汝南王悅大赦天下改太昌為永興以太
宗號尋改為永熙元年

二年春正月庚寅朔朝饗羣臣於太極前殿甲午齊獻

武王自晉陽出討介休朱兆丁酉大破之於赤洪嶺兆遁走自殺己亥車駕幸崧高石窟靈巖寺庚子又幸散施各有差庚戌儀同三司李琰之薨丁巳追尊皇考為武穆帝皇太妃馮氏為武穆后皇妣李氏為皇太妃以驃騎將軍前滄州刺史高聿為驃騎大將軍儀同三司蕭衍勞州刺史曹鳳東荊州刺史雷能勝等舉城內屬二月庚申以使持節鎮東將軍行汾州事張瓊為驃騎大將軍儀同三司辛酉以司空公高乾邕為使持節驃騎

大將軍開府儀同三司咸陽王坦為司空公三月己丑朔加驃騎大將軍滄州刺史賈顯智開府儀同三司辛卯詔以前普解諸行臺今阿至羅相率降款復以齊獻武王為大行臺隨機裁處甲午以車騎將軍蔚州刺史竇泰為使持節車騎大將軍開府儀同三司相州刺史使持節驃騎大將軍開府儀同三司徐州刺史高乾邕坐事賜死太師魯郡王肅薨戊申以使持節都督河渭部三州諸軍事驃騎大將軍世襲河州刺史梁景獻為

儀同三司丁巳以侍中太保司州牧趙郡王諶為太尉
公加羽葆鼓吹侍中太尉公南陽王寶炬為太尉開府
尚書令夏四月戊辰詔諸參佐自三府以下爰及外州
皆不得復加常侍及兼兩員雖已授者亦悉追之是月
青州人耿翔襲據膠州殺刺史裴粲通於蕭衍五月庚
寅詔諸幽枉未申事經一周已上悉集華林將親覽察
脫事已經年有司不列者聽其人各自陳訴若事連州
郡由緣淹歲者亦仰尚書總集以聞壬寅以使持節驃

騎大將軍儀同三司齊州刺史侯淵復為開府儀同三司乙巳詔曰大夫之職位秩貴顯員外之官亦為匪賤而下及胥吏帶領非一高卑渾雜有損彛章自今已後京官樂為稱事小職者直加散號將軍願罷卑官者聽為大夫及員外之職不宜仍前散實叅領其中旨特加者不在此例東徐州城民王早簡實等殺刺史崔庠據州入蕭衍六月壬申以驃騎大將軍開府儀同三司尚書右僕射樊子鵠為青膠刺使督濟州刺史大都督蔡

雋討耿翔丁丑以驃騎大將軍前行南兖州事念賢為儀同三司秋七月辛卯以使持節鎮北將軍大都督秦州刺史万俟普撥為驃騎大將軍儀同三司壬辰以太師司州牧廣陵王欣為大司馬侍中以太尉公趙郡王諶為太師並開府庚戌以前司徒公燕郡王賀拔允為太尉公八月乙丑齊文襄王來朝帝燕於華林都亭班賚部下各有差以驃騎大將軍前南岐州刺史司馬子如為儀同三司戊辰軍駕餞文襄王於河梁仍濟河而

返癸酉齊獻武王上表固讓王爵不許請分邑十萬戶
節降為品回授勲義從之九月壬子以散騎常侍車騎
大將軍左光祿大夫崔孝芬為儀同三司冬十月癸未
以衛將軍瓜州刺史秦臨縣開國伯高昌王麴子堅為
儀同三司進爵郡王十有一月癸巳持節征北將軍殷
州刺史邸珍為徐州大都督東道行臺僕射率將討東
徐州十有二月丁巳車駕狩於嵩陽巳巳遂幸溫湯丁
丑車駕還宮

三年春正月壬辰齊獻武王討費也頭於河西苦洩河
大破之獲其帥紇豆陵伊利遷其部落於內地二月東
梁州為夷民侵逼詔使持節車騎大將軍行東雍州事
泉企為東梁州行臺都督以討之己未蕭衍假節豫州
刺史南昌王毛香舉城內附授以持節安南將軍信州
刺史義昌王壬戌大赦天下丙子帝親釋奠禮先師辛
巳幸洪池陂遂遊田壬午以衛將軍前徐州刺史元祐
為衛大將軍儀同三司以驃騎將軍左衛將軍元斌之

為潁昌王三月壬寅以前侍中車騎大將軍李彧為驃
騎大將軍儀同三司夏四月戊午契丹國遣使朝貢辛
未高平王寧坐事降爵為公丙子高麗國遣使朝貢五
月丙戌增置勲府庶子廂別六百人又增騎官廂別二
百人依第出身騎官秩比直齋辛卯詔曰大魏得一居
宸乘六馭寓考風雲之所會宅日月之所中自北而南
東征西怨后來其蘇無思不偃而勾吳負險久遺度外
世祖太武皇帝握金鏡以照耀擊玉鼓以鏗鏘神武之

所牢籠威風之所輻輳莫不雲徹霧卷瓦解冰消長江
已北盡為魏土頃天步中圯國網時屯凶豎因機牙窺
上國疆場侵噬州郡淪胥乃眷東顧無忘寢食自非五
牛警旆七萃按部何以復文武之舊業拯塗炭於遺黎
朕將親總六軍經臨彭汴一勞永逸庶保無疆内外百
寮便可嚴備出頓之期更聽後勅時帝為斛斯椿元毗
王思政魏光等諂佞間阻貳於齊獻武王託討蕭衍威
暑徵發河南諸州之兵天下怪惡之語在斛斯椿傳丙

申以使持節侍中大司馬開府司州牧廣陵王欣為左
軍大都督太傅錄尚書事長孫稚為中軍四面大都督
丁酉帝幸華林都亭集京畿都督及軍士三千餘人慰
勉之庚子又幸華林都亭納訟壬寅又以長孫稚為後
軍大都督六月丁卯大都督源子恭鎮胡陽汝陽王暹
守石濟儀同三司賈顯智率豫州刺史斛斯壽東趨濟
州庚午吐谷渾國遣使朝貢丙子詔曰頃年以來天步
時阻干戈不戢荊棘斯生或徇節感恩奮不顧命或臨

戎對敵赴難如歸身首橫分骸骨不斂勲誠靡錄榮贈
莫加寤寐矜之良有嗟悼可普告內外所在言列若無
親近聽故友陳之尚書檢實隨狀科贈庶粗慰冤魂少
申惻隱庚辰以使持節車騎大將軍中軍大都督斛律
沙門為開府儀同三司秋七月辛巳朔以鎮東將軍前
大鴻臚卿太原王昶特為車騎大將軍儀同三司己丑
帝親總六軍十餘萬衆次於河橋以斛斯椿為前軍大
都督尋詔椿鎮虎牢又詔荊州刺史賀拔勝赴於行所

勝率所部次於汝水庚子以使持節征西將軍岐州刺史越肱特為儀同三司丁未帝為椿等迫脅遂出於長安己酉齊獻武王入洛賀拔勝走還荊州八月甲寅推司徒公清河王亶為大司馬承制總萬幾居尚書省辛酉齊獻武王西迎車駕戊辰制曰晦為明始亂實治基爰著天道又符人事故姬祚中微踐土有勤王之役劉氏將傾北軍致左袒之舉用能隆此遠年克茲卜世永熙之季權佞擅朝羣小是崇勲賢見害官緣價以貴賤

獄因貨而死生宗祏飄若綴旒民命棄如草莽大丞相
位居晉鄭任屬桓文興甲汾川問罪伊洛羣姦畏威擁
迫人主以自蔽衛遠出秦方雖車駕流移未即返御然
權佞將除天下延頸魏邦雖舊其化惟新思與兆民同
茲更始可大赦天下行臺侯景討荊州賀拔勝戰敗走
奔蕭衍九月癸巳以衛大將軍河南尹元子思為使持
節行臺僕射使持節驃騎大將軍開府儀同三司領軍
將軍婁昭為西道大都督并率左右侍官西迎車駕已

西椿黨毛鴻賓守潼關齊獻武王破擒之是日齊獻武
王東遷於洛是月東清河人傅皐殺太守韓子捷據郡
反會赦乃降冬十月戊辰使持節驃騎大將軍開府儀
同三司行青州事侯淵克東揚州斬刺史東萊王貴平
傳首京師閏十二月癸巳帝為宇文黑獺所害時年二
十五

史臣曰廣陵廢於前中興廢於後平陽猜惑自絕宗廟
普泰雅道居多永熙悖德為甚是俱亡滅天下所棄歟

魏書卷十一

魏書卷十一考證

前廢帝紀詔隴西王尒朱天光下文武討宿勤明達○

勤一本作勒北史亦作勒本書尒朱天光傳初賊帥

夏州人宿勤明達降天光于平涼亦作勤

臣照

按人

名之字互異無憑可定但既係夏州人宿勤明達與
番語近恐當是勒字

紫極非情翫○情一本作倩北史亦作倩

後廢帝紀旁磚三光○旁一本作磅

出帝紀齊獻武王次於武鄉○鄉監本誤卿今改正

魏書卷十一 考證

欽定四庫全書

魏書卷十二

齊

魏

收

撰

帝紀第十二

孝靜紀

孝靜皇帝諱善見清河文宣王亶之世子也母曰胡妃
永熙三年拜通直散騎侍郎八月為驃騎大將軍開府
儀同三司出帝既入關齊獻武王奉迎不克乃與百寮

會議推帝以奉肅宗之後時年十一冬十月丙寅即位於城東北大赦天下改永熙三年為天平元年庚午以太師趙郡王諶為大司馬以司空咸陽王坦為太尉以開府儀同三司高盛為司徒以開府儀同三司高昂為司空壬申有事於太廟詔曰安安能遷自古之明典所居靡定往昔之成規是以殷遷八城周卜三地吉凶有數隆替無恒事由於變通理出於不得已故也高祖孝文皇帝式觀乾象俯協人謀發自武州來幸嵩縣魏雖

舊國其命惟新及正光之季國步孔棘喪亂不已寇賊
交侵俾我生民無所措手今遠遵古式深驗時事考龜
襲吉遷宅漳滏庶克隆洪基再昌寶厯主者明為條格
及時發邁丙子車駕北遷於鄴詔齊獻武王留後部分
改司州為洛州以衛大將軍尚書令元弼為驃騎大將
軍儀同三司洛州刺史鎮洛陽詔從遷之戶百官給復
三年安居人五年十有一月兗州刺史樊子鵠南青州
刺史大野拔據瑕丘反庚寅車駕至鄴居北城相州之

廢改相州刺史為司州牧魏郡太守為魏尹徙鄴舊人
西徑百里以居新遷之人分鄴置臨漳縣以魏郡林慮
廣平陽丘汲郡黎陽東濮陽清河廣宗等郡為皇畿十
有二月丁卯燕郡王賀拔允薨庚午詔內外解嚴百司
悉依舊章從容雅服不得以矛鈇從事丙子遣侍中封
隆之等五人為大使巡諭天下丁丑赦畿內閏月蕭衍
以元慶和為鎮北將軍魏王入據平瀨鄉宇文黑獺既
害出帝乃以南陽王寶炬僭尊號初置四中郎將於礪

石橋置東中蒲泉置西中濟北置南中洛水置北中

二年春正月寶炬渭州刺史可朱渾道元擁部來降齊
獻武王迎納之賑其廩食己巳詔以齊獻武王為相國
假黃鉞劔履上殿入朝不趨餘悉如故王固讓不受己
亥兼尚書右僕射東南道行臺元晏討元慶和破走之
二月壬午以太尉咸陽王坦為太傅以司州牧西河王
怱為太尉己丑前南青州刺史大野拔斬樊子鵠以降
兗州平戌戍蕭衍司州刺史陳慶之寇豫州刺史堯雄

擊走之三月辛酉以司徒高盛為太尉以司空高昂為
司徒濟陰王暉業為司空齊獻武王討平山胡劉蠡升
斬之其子南海王復僭帝號獻武王進擊破擒之及其
弟西海王皇后夫人已下四百人并逋逃之人二萬餘
戶辛未以旱故詔京邑及諸州郡縣收瘞骸骨是春高
麗契丹並遣使朝貢夏四月前青州刺史侯梁反攻掠
青齊癸未濟州刺史蔡雋討平之壬辰降京師見囚五
月大旱勒城門殿門及省府寺署坊門澆人不簡王公

無限日得雨乃止六月元慶和寇南頓豫州刺史堯雄
大破之秋七月甲戌封汝南王悅孫綽為琅邪王八月
辛卯司空濟陰王暉業坐事免甲午發衆七萬六千人
營新宮九月齊獻武王以治民之官多不奉法請選朝
士清正者州別遣一人問疾苦丁巳以開府儀同三司
襄城王旭為司空冬十有一月丁未蕭衍將柳仲禮寇
荊州刺史王元擊破之癸丑祀圜丘甲寅閭闔門災龍
見并州人家井中丙寅詔齊文襄王起家為散騎常侍

驃騎大將軍左光祿大夫儀同三司太原郡開國公食
邑三千戶十有二月壬午車駕狩於鄴東甲午文武百
官量事各給祿

三年春正月癸卯朔饗羣臣於前殿戊申詔百官舉士
舉不稱才者兩免之齊獻武王襲寶炬西夏州克之詔
加齊獻武王九錫之禮侍中元子思敦諭固讓乃止二
月丁未蕭衍光州刺史郝樹以州內附丁酉詔加齊文
襄王使持節尚書令大行臺大都督以鮮卑高車酋庶

皆隸之三月甲寅以開府儀同三司華山王鷲為大司馬丁卯陽夏太守盧公纂據郡南叛大都督元整破之夏四月丁酉昌樂王誕薨五月癸卯賜鰥寡孤獨貧窮者衣物各有差丙辰以錄尚書事西河王恂為司州牧戊辰太尉高澄薨六月辛巳趙郡王諶薨秋七月庚子大赦天下蕭衍夏州刺史田獨鞞潁川防城都督劉鸞慶並以州內附八月并肆涿建四州隕霜大饑九月壬寅以定州刺史侯景兼尚書右僕射南道行臺節度諸

軍南討丙辰陽平人路季禮聚衆反辛酉御史中尉竇泰討平之冬十有一月戊申詔尚書可遣使巡檢河北流移飢人邢陘滏口所經之處若有死屍即為藏掩勿使靈臺枯骨有感於通夢廣漢露骸時聞於夜哭侯景攻克蕭衍楚州獲刺史桓和十有二月以并州刺史尉景為太保辛未遣使者板假老人官百歲已下各有差壬申大司馬清河王亶薨丁丑齊獻武王自晉陽西討次於蒲津司徒公大都督高敖曹趨上洛車騎大將軍

竇泰入自潼關癸未以太傅咸陽王坦為太師乙酉勿吉國遣使朝貢是歲高麗國遣使朝貢

四年春正月禁十五日相偷戲竇泰失利自殺丁巳高敖曹攻上洛克之擒竇炬驃騎大將軍洛州刺史梁企以汝陽王暹為錄尚書事夏四月辛未遷七帝神主入新廟大赦天下內外百官普進一階先是滎陽人張儉等聚眾反於大醜山通竇炬壬辰武衛將軍高元盛討破之六月己巳幸華林園理訟辛未詔尚書掩骼埋骸

推錄囚徒壬午閭闔門災先是蕭衍因益州刺史傅和
請通好秋七月甲辰遣兼散騎常侍李楷兼吏部郎中
盧元明兼通直散騎常侍李鄴使於蕭衍八月寶炬字
文黑獺寇陝州城陷刺史李徽伯為黑獺所殺九月侍
中元子思與其弟子華謀西入並賜死閏月乙丑衛將
軍右光祿大夫蔣天樂謀反伏誅禁京酤酒冬十月以
咸陽王坦為錄尚書事壬辰齊獻武王西討至沙苑不
克而還己酉寶炬行臺宮景壽都督楊白駒寇洛州大

都督韓延大破之寶炬又遣其子大行臺元季海大都督獨孤如願逼洛州刺史廣陽王湛棄城退還季海如願遂據金墉潁州長史賀若微執刺史田迅西叛引寶炬都督梁回據城寶炬又遣其都督趙繼宗右丞韋孝寬等攻陷豫州十有一月丙子以驃騎大將軍儀同三司万俟普為太尉十有二月甲寅蕭衍遣使朝貢河間人邢摩納范陽人盧仲禮等各聚衆反是歲高麗蠕蠕國並遣使朝貢

元象元年春正月有巨象自至碭郡陂中南兗州獲送
於鄴丁卯大赦改元大都督賀拔仁攻寶炬南汾州已
卯拔之擒其刺史韋子粲行臺任祥率豫州刺史堯雄
等與大行臺侯景司徒高敖曹大都督万俟受洛干等
於北豫相會俱討潁州梁回等棄城遁走潁州平二月
豫州刺史堯雄攻揚州拔之擒寶炬義州刺史韓顯揚
州長史丘岳送京師丙辰遣兼散騎常侍鄭伯猷使於
蕭衍三月齊獻武王固請解大丞相詔從之夏四月庚

寅曲赦畿內壬辰齊獻武王還晉陽請開酒禁六月壬辰帝幸華林都堂聽訟是夏山東大水蝦蟆鳴於樹上秋七月己亥高麗國遣使朝貢行臺侯景司徒公高敖曹圍寶炬將獨孤如願於金墉寶炬宇文黑獺並來赴救大都督庫狄干率諸將前驅齊獻武王總衆繼進八月辛卯戰於河陰大破之斬其大都督儀同三司寇洛生等二十餘人俘獲數萬司徒公高敖曹大都督李猛宋顯並戰沒寶炬留其將長孫子彥守金墉壬辰齊獻

武王濟河子彥棄城走九月大都督賀拔仁擊邢摩納
盧仲禮等破平之冬十月蕭衍遣使朝貢十有一月庚
寅遣陸操使於蕭衍齊獻武王來朝十有二月甲辰還
晉陽

興和元年春正月辛酉以尚書令孫騰為司徒三月甲
寅朔封常山郡王劭第二子曜為陳郡王夏五月齊文
襄王來朝甲戌立皇后高氏乙亥大赦天下是月高麗
國遣使朝貢六月乙酉以尚書左僕射司馬孚如為山

東黜陟大使尋為東北道大行臺差選勇士庚寅前潁
州刺史奚思業為河南大使簡發勇士丁酉蕭衍遣使
朝貢戊申開府儀同三司汝陽王暹薨秋七月丁丑詔
以齊獻武王為相國錄尚書事大行臺固辭相國八月
壬辰兼散騎常侍王元景兼通直散騎常侍魏收使於
蕭衍九月甲子發畿內民夫十萬人城鄴城四十日罷
辛未曲赦畿內死罪以下各有差冬十有一月癸亥以
新宮成大赦天下改元八十以上賜綾帽及杖七十以

上賜帛及有疾廢者賜粟帛築城之夫給復一年

二年春正月壬申以太保尉景為太傅以驃騎大將軍
開府儀同三司庠狄干為太保丁丑徙御新宮大赦內
外百官普進一階營構主將別優一階三月己卯蕭衍
遣使朝貢夏五月己酉西魏行臺宮延和陝州刺史宮
元慶率戶內屬置之河北新附賑廩各有差壬子遣兼
散騎常侍李象使於蕭衍閏月己丑封皇子景植為宜
陽王皇弟威為清河王謙為潁川王六月壬子大司馬

華山王鷲薨冬十月丁未蕭衍遣使朝貢十有二月乙卯遣兼散騎常侍崔長謙使於蕭衍是歲蠕蠕高麗勿吉國並遣使朝貢

三年春二月甲辰阿至羅出吐拔那渾大率部來降三月己酉梁州人公孫貴賓聚衆反自號天王陽夏鎮將討擒之夏四月戊申阿至羅國主副伏羅越居子去賓來降封為高車王六月乙丑蕭衍遣使朝貢秋七月齊文襄王如晉陽己卯宜陽王景植薨八月甲子遣兼散

騎常侍李騫使於蕭衍冬十月癸卯齊文襄王自晉陽
來朝先是詔文襄王與羣臣於麟趾閣議定新制甲寅
班於天下己巳發夫五萬人築漳濱堰三十五日罷癸
亥車駕狩於西山十有一月戊寅還宮丙戌以開府儀
同三司彭城王韶為太尉以度支尚書胡僧敬為司空
是歲蠕蠕高麗勿吉國並遣使朝貢

四年春正月丙辰蕭衍遣使朝貢夏四月丙寅遣兼散
騎常侍李繪使於蕭衍乙酉以侍中廣陽王湛為太尉

以尚書右僕射高隆之為司徒以太尉彭城王韶為錄
尚書事丁亥太傅尉景坐事降為驃騎大將軍開府儀
同三司辛卯以太保庫狄干為太傅以領軍將軍婁昭
為大司馬封祖裔為尚書右僕射五月辛巳齊獻武王
來朝請令百官月一面敷政事明揚仄陋納諫屏邪親
理獄訟褒黜勤怠牧守有愆節級相坐椒掖之內進御
以序後園鷹犬悉皆放棄六月還晉陽丙申復前侍中
樂浪王忠爵丁酉復陳留王景皓常山王紹宗高密王

永業爵秋八月庚戌以開府儀同三司吏部尚書侯景
為兼尚書僕射河南行臺隨機討防冬十月甲寅蕭衍
遣使朝貢齊獻武王園寶炬玉壁十有一月壬午班師
驃騎大將軍開府儀同三司青州刺史西河王怱薨十
有二月辛亥遣兼散騎常侍楊斐使於蕭衍是歲蠕蠕
高麗吐谷渾國並遣使朝貢

武定元年春正月壬戌朔大赦天下改元己巳車駕蒐
於邯鄲之西山癸酉還宮二月壬申北豫州刺史高仲

密據虎牢西叛三月寶炬遣其子突與宇文黑獺率衆來援仲密庚子圍河橋南城丙午帝親納訟戊申齊獻武王討黑獺戰於邙山大破之擒寶炬兄子臨洮王森蜀郡王榮宗江夏王昇鉅鹿王闡譙郡王亮驃騎大將軍儀同三司太子詹事趙善督將參寮等四百餘人俘斬六萬餘甲仗牛馬不可勝數豫洛二州平齊獻武王追奔至恒農而還夏四月封彭城王韶弟襲為武安王五月壬辰以克復虎牢降天下死罪以下囚乙未以吏

部尚書侯景為司空六月乙亥蕭衍遣使朝貢戊寅封
前員外散騎侍郎元長春為南郡王秋八月乙丑以汾
州刺史斛律金為大司馬壬午遣兼散騎常侍李渾使
於蕭衍是月齊獻武王召夫五萬於肆州北山築城西
自馬陵戍東至土陞四十日罷冬十有一月甲午車駕
狩於西山乙巳還宮是歲吐谷渾高麗蠕蠕國並遣使
朝貢

二年春正月地豆干國遣使朝貢二月丁卯徐州人劉

烏黑聚衆反遣行臺慕容紹宗討平之三月蕭衍遣使
朝貢以旱故宥死罪以下囚丙午以開府儀同三司孫
騰為太保壬子以齊文襄王為大將軍領侍中其文武
職事賞罰衆典詢稟之中書監元弼為錄尚書左僕射
司馬子如為尚書令以今上為左僕射夏四月室韋國
遣使朝貢五月甲午遣散騎常侍魏季景使於蕭衍丁
酉太尉廣陽王湛薨秋八月癸酉尚書令司馬子如坐
事免九月甲申以開府儀同三司濟陰王暉業為太尉

太師咸陽王坦坐事免以王還第冬十月丁巳太保孫
騰大司馬高隆之各為括戶大使凡獲逃戶六十餘萬
十有一月西河地陷有火出甲申以司徒高隆之為尚
書令以前大司馬婁昭為司徒齊文襄王如晉陽庚子
車駕有事於圜丘辛丑蕭衍遣使朝貢壬寅齊文襄王
從獻武王討山胡破之俘獲一萬餘戶分配諸州是歲
吐谷渾高麗蠕蠕勿吉國並遣使朝貢

三年春正月丙申遣兼散騎常侍李獎使於蕭衍丁未

齊獻武王請於并州置晉陽宮以處配沒之口二月庚申吐谷渾國奉其從妹以備後庭納為容華嬪夏五月甲辰大赦天下秋七月庚子蕭衍遣使朝貢冬十月遣中書舍人尉瑾使於蕭衍乙未齊獻武王請卬山之俘釋其桎梏配以人間寡婦十有二月以司空侯景為司徒以中書令韓軌為司空戊子以太保孫騰為錄尚書事是歲高麗吐谷渾蠕蠕國並遣使朝貢

四年夏五月壬寅蕭衍遣使朝貢六月庚子以司徒侯

景為河南大行臺應機討防秋七月壬寅遣兼散騎常侍元廓使於蕭衍八月移洛陽漢魏石經於鄴齊獻武王自鄴帥衆西伐文襄王會於晉州九月圍玉壁以挑之寶炬黑獺不敢應冬十有一月齊獻武王有疾班師文襄王如晉陽是歲室韋勿吉地豆干高麗蠕蠕國並遣使朝貢

五年春正月丙午齊獻武王薨於晉陽秘不發喪辛亥司徒侯景反潁州刺史司馬世雲以城應之景入據潁

城誘執豫州刺史高元成襄州刺史李密廣州刺史暴顯等遣司空韓軌驃騎大將軍儀同三司賀拔勝可朱渾道元左衛將軍劉豐等帥衆討之景乃遣使降於寶炬請師救援寶炬遣其將李景和王思政帥騎赴之思政等入據潁州景乃出走豫州乙丑蕭衍遣使朝貢二月侯景復背寶炬歸於蕭衍衍署景河南大將軍承制夏四月壬申大將軍齊文襄王來朝甲午遣兼散騎常侍李緯使於蕭衍五月丁酉朔大赦天下戊戌以尚書

右僕射襄城王旭為太尉甲辰以太原公今上為尚書
令領中書監餘如故詢以政事以青州刺史尉景為大
司馬以開府儀同三司庾狄干為太師以錄尚書事孫
騰為太傅以汾州刺史賀仁為太保以司空韓軌為司
徒以領軍將軍可朱渾道元為司空以司徒高隆之錄
尚書事以徐州刺史慕容紹宗為尚書左僕射高陽王
斌為右僕射戊午大司馬尉景薨六月司徒韓軌司空
可朱渾道元等自潁州班師乙酉帝為齊獻武王舉哀

於東堂服總纓詔尚書右僕射高陽王斌兼大鴻臚卿
赴晉陽監護喪事太尉襄城王旭兼尚書令奉詔宣慰
秋七月戊戌詔贈王假黃鉞使持節相國都督中外諸
軍事齊王璽綬輜輶車黃屋左纛前後羽葆鼓吹輕車
介士兼備九錫之禮謚曰獻武王以齊文襄王為使持
節大丞相都督中外諸軍事錄尚書事大行臺渤海王
壬寅詔王攝理軍國遣中使敦諭八月齊文襄王入朝
固辭丞相詔復授大將軍餘如故甲申葬齊獻武王於

鄴城西北車駕祖於漳濱九月齊文襄王還晉陽辛酉
蕭衍遣其兄子貞陽侯淵明帥衆寇徐州堰泗水於寒
山灌彭城以應侯景冬十月乙酉以尚書左僕射慕容
紹宗為東南道行臺與驃騎大將軍儀同三司大都督
高岳潘相樂討淵明十有一月大破之擒淵明及其二
子瑤道將帥二百餘人俘斬五萬級凍乏赴水死者不
可勝數十有二月乙亥蕭淵明至關帝御閭闔門讓而
宥之岳等回師討侯景是歲高麗勿吉國並遣使朝貢

六年春正月己亥大都督高岳等於渦陽大破侯景俘斬五萬餘人其餘溺死於渦水水為之不流景走淮南己未齊文襄王來朝請以寒山獲士賜百官及督將等各有差二月己卯蕭衍遣使款闕乞和并修書弔齊文襄王文襄王還晉陽三月癸巳以大尉襄城王旭為大司馬以開府儀同三司高岳為太尉辛亥以冬春亢旱赦罪人各有差夏四月甲子吏部令史張永和青州人崔閼等偽假人官事覺糾檢首者六萬餘人秋八月甲

戊以尚書左僕射慕容紹宗為大行臺與太尉高岳司徒韓軌大都督劉豐等討王思政於潁川引洧水灌其城九月乙酉蕭衍遣使朝貢冬十月戊申侯景濟江推蕭衍弟子臨賀王正德為主以攻建業是歲高麗室韋蠕蠕吐谷渾國並遣使朝貢

七年春正月戊辰蕭衍弟子北徐州刺史中山侯蕭正表以鍾離內屬封蘭陵郡開國公吳郡王三月丁卯侯景尅建業還以蕭衍為主衍弟子北兗州刺史定襄侯

蕭祇相譚侯蕭退來降衍江北郡國皆內屬夏四月大
行臺慕容紹宗大都督劉豐遇暴風溺水死甲辰詔以
齊文襄王為相國齊王祿綬綬讚拜不名入朝不趨劔
履上殿食冀州之渤海長樂安德武邑瀛州之河間五
郡邑十五萬戶餘如故王固辭是月侯景殺蕭衍立子
綱為主五月齊文襄王帥衆自鄴赴潁川六月丙申克
潁州擒寶炬大將軍尚書左僕射東道大行臺太原郡
開國公王思政潁州刺史皇甫僧顯等及戰士一萬餘

人男女數萬口齊文襄王遂如洛州秋七月齊文襄王
至自南討請宥思政之罪八月辛卯詔立皇子長仁為
皇太子齊文襄王薨於第祕不發喪癸巳大赦天下內
外百官並加二級甲午齊王如晉陽冬十月癸未以開
府儀同三司咸陽王坦為太傅甲午以開府儀同三司
潘相樂為司空十有二月甲辰吳郡王蕭正表薨己酉
以并州刺史彭樂為司徒是歲蠕蠕地豆于室韋高麗
吐谷渾國並遣使朝貢

八年春正月辛酉帝為齊文襄王舉哀於東堂丁卯詔
贈齊文襄王假黃鉞使持節相國都督中外諸軍事齊
王璽綬輜車黃屋左纛前後部羽葆鼓吹輕車介士
備九錫之禮謚曰文襄王戊辰詔齊王為使持節丞相
都督中外諸軍事錄尚書事大行臺齊郡王食邑一萬
戶甲戌地豆干契丹國並遣使朝貢二月甲申葬齊文
襄王車駕祖於漳濱庚寅以尚書令高隆之為太保三
月庚申進齊郡王爵為齊王夏四月乙巳蠕蠕遣使朝

貢五月甲寅詔齊王為相國總百揆封冀州之渤海長樂安德武邑瀛州之河間高陽章武定州之中山常山博陵十郡二十萬戶備九錫之禮以齊國太妃為王太后王妃為王后丙辰詔歸帝位於齊國即日遜於別宮齊天保元年五月己未封帝為中山王邑一萬戶上書不稱臣答不稱詔載天子旌旗行魏正朔乘五時副車封王諸子為縣公邑各一千戶奉絹三萬匹錢一千萬粟二萬石奴婢三百人水碾一具田百頃園一所於中

山國立魏宗廟二年十二月己酉中山王殂時年二十八三年二月奉謚曰孝靜皇帝葬於漳西山崗其後發之陵崩死者六十人帝好文學美容儀力能挾石師子以踰牆射無不中嘉辰宴會多命羣臣賦詩從容沉雅有孝文風齊文襄王嗣事甚忌焉以大將軍中兵參軍崔季舒為中書黃門侍郎令監察動靜小大皆令季舒知文襄與季舒書曰癡人復何似癡勢小差未帝嘗與獵於鄴東馳逐如飛監衛都督烏那羅受工伐從後呼

帝曰天子莫走馬大將軍怒文襄嘗侍飲大舉觴曰臣
澄勸陛下酒帝不悅曰自古無不亡之國朕亦何用此
活文襄怒曰朕朕狗脚朕文襄使季舒毆帝三拳奮衣
而出明日文襄使季舒勞帝帝亦謝焉賜絹季舒未敢
受以啓文襄文襄使取一段帝東百匹以與之曰亦一
段耳帝不堪憂辱詠謝靈運詩曰韓亡子房奮秦帝魯
連恥本自江海人忠義動君子常侍侍講荀濟知帝意
乃與華山王大器元瑾密謀於宮內為山而作地道向

北城至千秋門門者覺地下響動以告文襄文襄勒兵入宮曰陛下何意反邪臣父子功存社稷何負陛下邪將殺諸妃嬪帝正色曰王自欲反何關於我我尚不惜身何況妃嬪文襄下牀叩頭大啼謝罪於是酣飲夜久乃出居三日幽帝於含草堂大器瑾等皆見烹於市及將禪位於文宣襄城王旭及司徒潘相樂侍中張亮黃門郎趙彥琛等求入奏事帝在昭陽殿見之旭曰五行遞運有始有終齊王聖德欽明萬姓歸仰臣等昧死聞

奏願陛下則堯禪舜帝便斂容答曰此事推挹已久謹當遜避又云若爾須作詔書侍郎崔劼裴讓之奏云詔已作訖即付楊愔進於帝凡十條書訖帝曰將安朕何所復若為而去楊愔對曰在北城別有館宇還備法駕依常仗衛而去帝乃下御座步就東廊口詠范蔚宗後漢書贊云獻生不辰身播國屯終我四百永作虞賓所司奏請發帝曰古人念遺簪敝履欲與六宮別可乎高隆之曰今天下猶陛下之天下況在後宮乃與夫人妃

嬪以下訣莫不歎歎掩涕嬪趙國李氏誦陳思王詩云
王其愛玉體俱享黃髮期皇后已下皆哭直長趙德以
散轡車一乘候於東上閣帝上車德超上車持帝帝肘
之曰朕畏天順人授位相國何物奴敢逼人趙德尚不
下及出雲龍門王公百寮衣冠拜辭帝曰今日不減常
道鄉公漢獻帝衆皆悲愴高隆之泣灑遂入北城下司
馬子如南宅及文宣行幸常以帝自隨帝后封太原公
主常為帝嘗食以護視焉竟遇酖而崩

魏書卷十二

魏書卷十二考證

帝紀第十二○魏收書孝靜紀亡後人所補

孝靜帝紀車駕北遷於鄴○北史曰高歡推清河王亶
子善見為主徙都鄴是為東魏魏於此始分為二矣
寶炬渭州刺史○本書以齊得統於東魏故直稱西魏
文帝為寶炬

春正月壬戌朔大赦天下改元○臣人龍按朔日為壬

戌則下文己巳車駕薨於邯鄲之西山乃初八日癸

酉還宮乃十二日直須至三月初十日乃有壬申不知二月內何以又有壬申也北史亦同

以今上為左僕射。○北史以太原公高洋為左僕射齊天保二年詔魏收修魏史故稱今上也

移洛陽漢魏石經于鄴。○綱目漢靈帝熹平四年立石經四部本碑凡四十六枚

齊王如晉陽。○齊王亦謂高洋也前稱今上未有封號莫可稱也稱太原公今上嫌公爵亦人臣也此稱齊

王則雖臣而近於君矣收之書法云爾

魏書卷十二考證

欽定四庫全書

史部

魏書卷十三至
五

詳校官編修

臣溫汝适

洗馬

臣

王坦修覆勘

覆校官

中書

臣

孫希旦

校對官

中書

臣

陳林

謄錄監生

臣

陳琴高

謄錄監生

臣

熊篤軒

欽定四庫全書

魏書卷十三

齊

魏

列傳第一

皇后列傳

漢因秦制帝之祖母曰太皇太后母曰皇太后妃曰皇后餘則多稱夫人隨世增損非如周禮有夫人嬪婦御妻之定數焉魏晉相因時有昇降前史言之具矣魏氏

王業之兆雖始於神元至於昭成之前世崇儉質妃嬪
嬪御率多闕焉惟以次第為稱而章平思昭穆惠煬烈
八帝妃后無聞太祖追尊祖妣皆從帝諡為皇后始立
中宮餘妾或稱夫人多少無限然皆有品次世祖稍增
左右昭儀及貴人椒房中式數等後庭漸已多矣又魏
故事將立皇后必令手鑄金人以成者為吉不成則不
得立也又世祖高宗緣保母劬勞之恩並極尊崇之義
雖事乖典禮而觀過知仁高祖改定內官左右昭儀位

視大司馬三夫人視三公三嬪視三卿六嬪視六卿世婦視中大夫御女視元士後置女職以典內事內司視尚書令僕作司大監女侍中三官視二品監女尚書美人女史女賢人書史書女小書女五官視三品中才人供人中使女生才人恭使宮人視四品春衣女酒女饗女食奚官女奴視五官

神元皇后竇氏沒鹿回部大人賓之女也賓臨終誡其二子速侯回題令善事帝及賓卒速侯等欲因帝會喪

為變語頗漏泄帝聞之知其終不奉順乃先圖之於是
伏勇士於宮中晨起以佩刀殺后馳使告連侯等言后
暴崩連侯等驚走來赴因執而殺之

文帝皇后封氏生桓穆二帝早崩昭帝立乃葬焉高宗
初穿天淵池獲一石銘稱桓帝葬母封氏遠近赴會二
十餘萬人有司以聞命藏之太廟

次妃蘭氏生二子長子曰藍早卒次子思帝也

桓帝皇后祁氏生三子長曰普根次惠帝次煬帝平文

崩后攝國事時人謂之女國后性猛忌平文之崩后所為也

平文皇后王氏廣甯人也年十三因事入宮得幸於平文生昭成帝平文崩昭成在襁褓時國有內難將害諸皇子后匿帝於袴中懼人知呪曰若天祚未終者汝便無聲遂良久不啼得免於難昭成初欲定都於溫源川築城郭起宮室議不決后聞之曰國自上世遷徙為業今事難之後基業未固若城郭而居一旦寇來難卒遷

動乃止烈帝之崩國祚殆危興復大業后之力也十八年崩葬雲中金陵太祖即位配饗太廟

昭成皇后慕容氏元真之女也初帝納元真妹為妃未幾而崩元真復請繼好遣大人長孫秩逆后元真送于境上后至有寵生獻明帝及秦明王后性聰敏多知沉厚善決斷專理內事每事多從初昭成遣衛辰兄悉勿祈還部落也后戒之曰汝還必深防衛辰辰姦猾終當滅汝悉勿祈死其子果為衛辰所殺卒如后言建國二

十三年崩太祖即位配饗太廟

獻明皇后賀氏父野干東部大人后少以容儀選入東宮生太祖苻洛之內侮也后與太祖及故臣吏避難北徙俄而高車奄來抄掠后乘車與太祖避賊而南中路失輅后懼仰天而告曰國家胄豈止爾絕滅也惟神靈扶助遂馳輪正不傾行百餘里至七介山南而得免難後劉顯使人將害太祖帝姑為顯弟亢湑妻知之密以告后梁眷亦來告難后乃令太祖去之后夜飲顯使

醉向晨故驚廐中羣馬顯使起視馬后泣而謂曰吾諸子始皆在此今盡亡失汝等誰殺之故顯不使急追太祖得至賀蘭部羣情未甚歸附后從弟外朝大人悅舉部隨從供奉盡禮顯怒將害后后夜奔亢湫家匿神車中三日亢湫舉室請救乃得免會劉顯部亂始得亡歸後后弟染干忌太祖之得人心舉兵圍逼行宮后出謂染干曰汝等今安所置我而欲殺吾子也染干慙而去後后少子秦王觚使于燕慕容垂止之后以觚不返憂

念寢疾皇始元年崩時年四十六祔葬于盛樂金陵後
追加尊諡配饗焉

道武皇后慕容氏寶之季女也中山平入充掖庭得幸
左丞相衛王儀等奏請立皇后帝從羣臣議令后鑄金
人成乃立之告於郊廟封后母孟為溧陽君後崩

道武宣穆皇后劉氏劉眷女也登國初納為夫人生華
陰公主後生太宗后專理內事寵待有加以鑄金人不
成故不得登后位魏故事後宮產子將為儲貳其母皆

賜死太祖末年以舊法薨太宗即位追尊謚號配饗太廟自此後宮人為帝母皆正位配饗焉

明元昭哀皇后姚氏姚興女也興封西平長公主太宗以后禮納之後為夫人后以鑄金人不成未昇尊位然帝寵幸之出入居處禮秩如后焉是後猶欲正位而后謙讓不當泰常五年薨帝追恨之贈皇后璽綬而後加謚焉葬雲中金陵

明元密皇后杜氏魏郡鄴人陽平王超之妹也初以良

家子選入太子宫有寵生世祖及太宗即位拜貴嬪泰
常五年薨謚曰密貴嬪葬雲中金陵世祖即位追尊號
謚配饗太廟又立后廟于鄴刺史四時薦祀以魏郡太
后所生之邑復其調役後甘露降于廟庭高宗時相州
刺史高閭表修后廟詔曰婦人外成理無獨祀陰必配
陽以成天地未聞有革之國立太妣之饗此乃先皇所
立一時之至感非經世之遠制便可罷祀先是世祖保
母竇氏初以夫家坐事誅與二女俱入宮操行純備進

退以禮太宗命為世祖保母性仁慈勤撫導世祖感其
恩訓奉養不異所生及即位尊為保太后後尊為皇太
后封其弟漏頭為遼東王太后訓釐內外甚有聲稱性
恬素寡欲喜怒不形於色好揚人之善隱人之過世祖
征涼州蠕蠕吳提入寇太后命諸將擊走之真君元年
崩時年六十三詔天下大臨三日太保盧魯元監護喪
事謚曰惠慈崢山從后意也初后嘗登崢山顧謂左右
曰吾母養帝躬敬神而愛人若死而不滅必不為賤鬼

然於先朝本無位次不可違禮以從園陵此山之上可以終託故葬焉別立后寢廟於崢山建碑頌德

太武皇后赫連氏赫連屈丐女也世祖平統萬納后及二妹俱為貴人後立為皇后高宗初崩祔葬金陵

太武敬哀皇后賀氏代人也初為夫人生恭宗神麴元年薨追贈貴嬪葬雲中金陵後追加號謚配饗太廟

景穆恭皇后郁久閭氏河東王毗妹也少以選入東宮有寵真君元年生高宗世祖末年薨高宗即位追尊號

謚葬雲中金陵配饗太廟

高宗乳母常氏本遼西人太延中以事入宮世祖選乳
高宗慈和履順有劬勞保護之功高宗即位尊為保太
后尋為皇太后謁於郊廟和平元年崩詔天下大臨三
日謚曰昭葬於廣甯磨笄山俗謂之鳴鷄山太后遺志
也依惠太后故事別立寢廟置守陵二百家樹碑頌德
文成文明皇后馮氏長樂信都人也父朗秦雍二州刺
史西城郡公母樂浪王氏后生於長安有神光之異朗

坐事誅后遂入宮世祖左昭儀后之姑也雅有母德撫
養教訓年十四高宗踐極以選為貴人後立為皇后高
宗崩故事國有大喪三日之後御服器物一以燒焚百
官及中宮皆號泣而臨之后悲叫自投火中左右救之
良久乃蘇顯祖即位尊為皇太后丞相乙渾謀逆顯祖
年十三居于諒闇太后密定大策誅渾遂臨朝聽政及
高祖生太后躬親撫養是後罷令不聽政事太后行不
正內寵李奕顯祖因事誅之太后不得意顯祖暴崩時

言太后為之也。承明元年，尊曰太皇太后，復臨朝聽政。太后性聰達，自入宮掖，粗學書計，及登尊極，省決萬幾。高祖詔曰：「朕以虛寡幼纂寶歷，仰恃慈明，緝寧四海，欲報之德，正覺是憑。諸鵲鳥傷生之類，宜放之山林，其以此地為太皇太后經始靈塔。於是罷鷹師曹，以其地為報德佛寺。太后與高祖遊于方山，顧瞻川阜，有終焉之志。因謂羣臣曰：『舜葬蒼梧，二妃不從，豈必遠祔山陵？然後為貴哉？』吾百年之後，神其安此。」高祖乃詔有司營建。

壽陵於方山又起永固石室將終為清廟焉太和五年起作八年而成刊石立碑頌太后功德太后以高祖富於春秋乃作勸戒歌三百餘章又作皇誥十八篇文多不載太后立文宣王廟於長安又立思燕佛圖於龍城皆刊石立碑太后又制內屬五廟之孫外戚六親總麻皆受復除性儉素不好華飾躬御縵繒而已宰人上膳案裁徑尺羞膳滋味減於故事十分之八太后嘗以體不安服菴蘭子宰人昏而進粥有蠅蜓在焉后舉匕得

之高祖侍側大怒將加極罰太后笑而釋之自太后臨朝專政高祖雅性孝謹不欲參決事無巨細一稟於太后太后多智略猜忍能行大事生殺賞罰決之俄頃多有不關高祖者是以威福無作震動內外故杞道德王遇張祐苻承祖等拔自微閭歲中而至王公王叔出入卧内數年便為宰輔賞賚財帛以千萬億計金書鐵券許以不死之詔李冲雖以器能受任亦由見寵帷幄密加錫賚不可勝數后性嚴明假有寵待亦無所縱左右

纖介之愆動加捶楚多至百餘少亦數十然性不宿憾
尋亦待之如初或因此更加富貴是以人人懷於利欲
至死而不思退太后曾與高祖幸靈泉池燕羣臣及藩
國使人諸方渠帥各令為其方舞高祖帥羣臣上壽太
后忻然作歌帝亦和歌遂命羣臣各言其志於是和歌
者九十人太后外禮民望元丕游明根等頒賜金帛輿
馬每至褒美獻等皆引丕等參之以示無私又自以過
失懼人議已小有疑忌便見誅戮迄后之崩高祖不知

所生至如李訢李惠之徒猜嫌覆滅者十餘家死者數百人率多枉濫天下寃之十四年崩於太和殿時年四十九其日有雄雉集于太華殿高祖酌飲不入口五日毀幕過禮謚曰文明太皇太后葬於永固陵日中而反虞於鑒立殿詔曰尊旨從儉不申罔極之痛稱情允禮仰損儉訓之德進退思惟倍用崩感又山陵之節亦有成命內則方丈外裁揜坎脫於孝子之心有所不盡者室中可二丈墳不得過三十餘步今以山陵萬世所仰

復廣為六十步辜負遺旨益以痛絕其幽房大小棺槨
質約不設明器至於素帳繆茵瓷瓦之物亦皆不置此
則遵先志從冊令俱奉遺事而有從有違未達者或以
致怪梓宮之裏玄堂之內聖靈所憑是以一一奉遵仰
昭儉德其餘外事有所不從以盡痛慕之情其宣示遠
近著告羣司上明儉誨之善下彰違命之失及卒哭孝
文服哀近臣從服三司已下外臣哀服者變服就練七
品已下盡除即吉設祔祭於太和殿公卿已下始親公

事高祖毀瘠絕酒肉不內御者三年初高祖孝於太后
乃於永固陵東北里餘豫營壽宮有終焉瞻望之志及
遷洛陽乃自表瀍西以為山園之所而方山虛宮至今
猶存號曰萬年堂云

文成元皇后李氏梁國蒙縣人母頓丘王峻之妹也后
之生也有異於常父方叔恒言此女當大貴及長姿質
美麗世祖南征永昌王仁出壽春軍至后宅因得后及
仁鎮長安遇事誅后與其家人送平城宮高宗登白樓

望見美之謂左右曰此婦人佳乎左右咸曰然乃下臺
后得幸於齋庫中遂有娠常太后後問后后云為帝所
幸仍有娠時守庫者亦私書壁記之別加驗問皆相符
同及生顯祖拜貴人太安二年太后令依故事令后具
條記在南兄弟及引所結宗兄洪之悉以付託臨訣每
一稱兄弟輒拊胃慟泣遂薨後謚曰元皇后葬金陵配
饗太廟

獻文思皇后李氏中山安喜人南郡王惠之女也姿德

婉淑年十八以選入東宮顯祖即位為夫人生高祖皇
興三年薨上下莫不悼惜葬金陵承明元年追崇號謚
配饗太廟

孝文貞皇后林氏平原人也叔父金閭起自閹官有寵
於常太后官至尚書平涼公金閭兄勝為平涼太守金
閭顯祖初為定州刺史未幾為乙渾所誅兄弟皆死勝
無子有二女入掖庭后容色美麗得幸於高祖生皇子
恂以恂將為儲貳太和七年后依舊制薨高祖仁恕不

欲襲前事而稟文明太后意故不果行謚曰貞皇后葬金陵及恂以罪賜死有司奏追廢后為庶人

孝文廢皇后馮氏太師熙之女也太和十七年高祖既終喪太尉元丕等表以長秋未建六宮無主請正內位高祖從之立后為皇后高祖每遵典禮后及夫嬪以下妾御皆以次進車駕南伐后留京師高祖又南征后率六宮遷洛陽及后父熙兄誕薨高祖為書慰以敘哀情及車駕還洛恩遇甚厚高祖後重引后姊昭儀至洛稍

有寵后禮愛漸衰昭儀自以年長且前入宮掖素見待
念輕后而不率妾禮后雖性不妬忌時有愧恨之色昭
儀規為內主譖構百端尋廢后為廢人后貞謹有德操
遂為練行尼後終於瑤光佛寺

孝文幽皇后亦馮熙女母曰常氏本微賤得幸於熙熙
元妃公主薨後遂主家事生后與北平公夙文明太皇
太后欲家世貴寵乃簡熙二女俱入掖庭時年十四其
一早卒后有姿媚偏見愛幸未幾疾病文明太后乃遣

還家為尼高祖猶留念焉歲餘而太后崩高祖服終頗存訪之又聞后素疹痊除遣閹官雙三念璽書勞問遂迎赴洛陽及至寵愛過初專寢當夕宮人稀復進見拜為左昭儀後立為皇后始以疾歸頗有失德之聞高祖頻歲南征后遂與中官高菩薩私亂及高祖在汝南不豫后便公然醜恣中常侍雙蒙等為其心腹中常侍劇鵬諫而不從憤懼致死是時彭城公主宋王劉昶子婦也年少廢居北平公馮夙后之同母弟也后求婚於高

祖高祖許之公主志不願后欲強之婚有日矣公主密與侍婢及家僮十餘人乘輕車冒霖雨赴懸瓠奉謁高祖自陳本意因言后與菩薩亂狀高祖聞而駭愕未之全信而祕匿之惟彭城王侍疾左右具知其事此後后漸憂懼與母常氏求託女巫禱厭無所不至願高祖疾不起一旦得如文明太后輔少主稱命者賞報不貲又取三牲宮中妖祠假言祈福專為左道母常或自詣宮中或遣侍婢與相報答高祖自豫州北幸鄴后慮還見

治檢彌懷危怖驟令閹人託參起居皆賜之衣裳殷勤
託寄勿使漏洩亦令雙蒙充行省其信不然惟小黃門
蘇興壽密陳委曲高祖問其本末勅以勿洩至洛執問
菩薩雙蒙等六人迭相證舉具得情狀高祖以疾卧舍
溫室夜引后并列菩薩等於戶外后臨入令閹人搜衣
中稍有寸刃便斬后頓首泣謝乃賜坐東楹去御筵二
丈餘高祖令菩薩等陳狀又讓后曰汝母有妖術可具
言之后乞屏左右有所密啓高祖勅中侍悉出唯令長

秋卿白整在側取衛直刀拄之后猶不言高祖乃以綿
堅塞整耳自小語呼整再三無所應乃令后言事隱人
莫知之高祖乃喚彭城北海二王令入坐言昔是汝嫂
今乃他人但入勿避二王固辭不獲命及入高祖云此
老嫗乃欲白刃挿我肋上可窮問本末勿有所難高祖
深自引過致愧二王又云馮家女不能復相廢遂且使
在宮中空坐有心乃能自死汝等勿謂吾猶有情也高
祖素至孝猶以文明太后故未便行廢良久二王出乃

賜后辭死訣再拜稽首涕泣獻欵令入東房及入宮後
帝命閹人有所問於后后罵曰天子婦親面對豈令汝
傳也高祖怒勅后母常入示與后狀常撻之百餘乃止
高祖尋南伐后留京師雖以罪失寵而夫人嬪妾奉之
如法惟令世宗在東宮無朝謁之事高祖疾甚謂彭城
王勰曰後宮久乖陰德自絕於天若不早為之所恐成
漢末故事吾死之後可賜自盡別宮葬以后禮庶掩馮
門之大過高祖崩梓宮達魯陽乃行遺詔北海王詳奉

宣遺旨長秋卿白整等入授后藥后走呼不肯引決曰
官豈有此也是諸王輩殺我耳整等執持強之乃含椒
而盡殯以后禮梓宮次洛南咸陽王禧等知審死相視
曰若無遺詔我兄弟亦當作計去之豈可令失行婦人
宰制天下殺我輩也謚曰幽皇后葬長陵塋內

孝文昭皇后高氏司徒公肇之妹也父颺母蓋氏凡四
男三女皆生於東裔高祖初乃舉室西歸近龍城鎮鎮
表后德色婉豔任充宮掖及至文明太后親幸北部曹

見后姿貌奇之遂入掖庭時年十三初后幼曾夢在堂
內立而日光自窓中照之灼灼而熱后東西避之光猶
斜照不已如是數夕后自怪之以白其父颺颺以問遼
東人閔宗宗曰此奇徵也貴不可言颺曰何以知之宗
曰夫日者君人之德帝王之象也光照女身必有恩命
及之女避猶照者主上來求女不獲已也昔有夢月入
懷猶生天子況日照之徵此女必將被帝命誕育人君
之象也遂生世宗後生廣平王懷次長樂公主及馮昭

儀寵盛密有母養世宗之意后自代如洛陽暴薨於汲
郡之共縣或云昭儀遣人賊后也世宗之為皇太子三
日一朝幽后后拊念慈愛有加高祖出征世宗入朝必
久留后宫親視櫛沐母道隆備其後有司奏請加昭儀
號謚曰文昭貴人高祖從之世宗踐阼追尊配饗后先
葬城西長陵東南陵制卑局因就起山陵號終寧陵置
邑戶五百家肅宗詔曰文昭皇太后德協坤儀美符文
姁作合高祖實誕英聖而夙世淪暉孤塋弗祔先帝孝

感自衷遷奉未遂永言哀恨義結幽明廢呂尊薄禮仲
漢代又詔曰文昭皇太后尊配高祖祔廟定號促令遷
奉自終及始太后當主可更上尊號稱太皇太后以同
漢晉之典正姑婦之禮廟號如舊文昭遷靈櫬於長陵
兆西北六十步初開終寧陵數丈於梓宮上獲大蛇長
丈餘黑色頭有王字蟄而不動靈櫬既遷置蛇舊處
宣武順皇后于氏太尉烈弟勣之女也世宗始親政事
烈時為領軍總心膂之任以嬪御未備因左右諷諭稱

后有容德世宗乃迎入為貴人時年十四甚見寵愛立為皇后謁于太廟后靜默寬容性不妬忌生皇子昌三歲夭歿其後暴崩宮禁事祕莫能知悉而世議歸咎于高夫人葬永泰陵謚曰順皇后

宣武皇后高氏文昭皇后弟偃之女也世宗納為貴人生皇子早夭又生建德公主後拜為皇后甚見禮重性妬忌宮人希得進御及肅宗即位上尊號曰皇太后尋為尼居瑤光寺非大節慶不入宮中建德公主始五六

歲靈太后恒置左右撫愛之神龜元年太后出覲母武
邑君時天文有變靈太后欲以后當禍是夜暴崩天下
寃之喪還瑤光佛寺殯葬皆以尼禮初高祖幽后之寵
也欲專其愛後宮接御多見阻遏高祖時言于近臣稱
婦人妬防雖王者亦不能免況士庶乎世宗暮年高后
悍忌夫人嬪御有至帝崩不蒙侍接者由是在洛二十
餘年皇子全育者惟肅宗而已

宣武靈皇后胡氏安定臨涇人司徒國珍女也母皇甫

氏產后之日赤光四照京兆山北縣有趙胡者善於卜
相國珍問之胡云賢女有大貴之表方為天地母生天
地主勿過三人知也后姑為尼頗能講道世宗初入講
禁中積數歲諷左右稱后姿行世宗聞之乃召入掖庭
為承華世婦而椒掖之中以國舊制相與祈祝皆願生
諸王公主不願生太子唯后每謂夫人等言天子豈可
獨無兒子何緣畏一身之死而令皇家不育冢嫡乎及
肅宗在孕同列猶以故事相恐勸為諸計后固意確然

幽夜獨誓云但使所懷是男次第當長子子生身死所
不辭也既誕肅宗進為充華嬪先是世宗頻喪皇子自
以春秋長矣深加慎護為擇乳保皆取良家宜子者養
於別宮皇后及充華嬪皆莫得而撫視焉及肅宗踐阼
尊后為皇太妃後尊為皇太后臨朝聽政猶稱殿下下
令行事後改令稱詔羣臣上書曰陛下自稱曰朕太后
以肅宗冲幼未堪親祭欲傍周禮夫人與君交獻之義
代行祭禮訪尋故式門下名禮官博士議以為不可而

太后欲以幃幔自鄣觀三公行事重問侍中崔光光便據漢和熹鄧后薦祭故事太后大悅遂攝行初祀太后性聰悟多才藝姑既為尼幼相依託畧得佛經大義親覽萬幾手筆斷決幸西林園法流堂命侍臣射不能者罰之又自射針孔中之大悅賜左右布帛有差先是太后勅造申訟車時御馬出自雲龍大司馬門從宮西北入自千秋門以納寃訟又親策孝秀州郡計吏於朝堂太后與肅宗幸華林園宴羣臣于都亭曲水令王公已

下各賦七言詩太后詩曰化光造物含氣貞帝詩曰恭
已無為賴慈英王公已下賜帛有差太后父薨百寮表
請公除太后不許尋幸永寧寺親建刹於九級之基僧
尼士女赴者數萬人及改葬文昭高后太后不欲令肅
宗主事乃自為喪主出至終寧陵親奠遣事還哭於太
極殿至於訖事時自主馬後幸嵩高山夫人九嬪公主
已下從者數百人昇于頂中廢諸淫祀而胡天神不在
其列後幸左藏王公嬪主已下從者百餘人時令任力

負布絹即以賜之多者過二百匹少者百餘匹唯長樂公主手持絹二十匹而出示不異衆而無勞也世稱其廉儀同陳留公李崇章武王融並以所負過多顛仆於地崇乃傷腰融至損脚時人為之語曰陳留章武傷腰折股貪人敗類穢我明主尋幸闕口溫水登鷄頭山自射象牙簪一發中之敕示文武時太后得志逼幸清河王懌淫亂肆情為天下所惡領軍元乂長秋卿劉騰等奉肅宗於顯陽殿幽太后於北宮於禁中殺懌其後太

后從子都統僧敬與備身左右張車渠等數十人謀殺
义復奉太后臨朝事不克僧敬坐徙邊車渠等死胡氏
多免黜後肅宗朝太后於西林園譙文武侍臣飲至日
夕义乃起至太后前自陳外云太后欲害已及騰太后
答云無此語遂至于極昏太后乃起執肅宗手下堂言
母子不聚久今暮共一宿諸大臣送我入太后與肅宗
向東北小閣左衛將軍奚康生謀欲殺义不果自劉騰
死义又寬怠太后與肅宗及高陽王雍為計解义領軍

太后復臨朝大赦改元自是朝政踈緩威恩不立天下
牧守所在貪恠鄭儼汙亂宮掖勢傾海內李神軌徐紇
並見親侍一二年中位總禁要手握王爵輕重在心宣
淫於朝為四方之所厭穢文武解體所在亂逆土崩魚
爛由於此矣僧敬又因聚集親族遂涕泣諫曰陛下母
儀海內豈宜輕脫如此后大怒自是不召僧敬太后自
以行不修懼宗室所嫌於是內為朋黨防蔽耳目肅宗
所親幸者太后多以事害焉有蜜多道人能胡語肅宗

置於左右太后慮其傳致消息三月三日於城南大巷中殺之方懸賞募賊又於禁中殺領左右鴻臚少卿谷會紹達並帝所親也母子之間嫌隙屢起鄭儼慮禍乃與太后計因潘充華生女太后詐以為男便大赦改年肅宗之崩事出倉卒時論咸言鄭儼徐紘之計於是朝野憤歎太后乃奉潘嬪女言太子即位經數日見人心已安始言潘嬪本實生女今宜更擇嗣君遂立臨洮王子釗為主年始三歲天下愕然及武泰元年介朱榮稱

兵渡河太后盡召肅宗六宮皆令入道太后亦自落髮
榮遣騎拘送太后及幼主於河陰太后對榮多所陳說
榮拂衣而起太后及幼主並沉於河太后妹馮翊君收
瘞於雙靈佛寺出帝時始葬以后禮而追加謚

孝明皇后胡氏靈太后從兄冀州刺史盛之女靈太后
欲榮重門族故立為皇后肅宗頗有酒德專嬖充華潘
氏后及嬪御並無過寵太后為肅宗選納抑屈人流時
博陵崔孝芬范陽盧道約隴西李瓚等女但為世婦諸

人訴訟咸見忿責武泰初后既入道遂居於瑤光寺

孝靜皇后高氏齊獻武王之第二女也天平四年詔聘
以為皇后王前後固辭帝不許興和初詔侍中司徒公
孫騰司空公襄城王旭兼尚書令司州牧西河王恂兼
太常卿及宗正卿元孝友等奉詔致禮并備宮官侍衛
以后駕迎於晉陽之丞相第五月立為皇后大赦天下
齊受禪降為中山王妃後降于尚書左僕射楊遵彥
史臣曰始祖生自天女克昌後葉靈后姪恣卒亡天下

傾城之戒其在茲乎鈎弋年稚子幼漢武所以行權魏
世遂為常制子貴母死矯枉之義不亦過哉高祖終革
其失良有以也

魏書卷十三

魏書卷十三考證

皇后列傳○魏收書亡後人所補

桓帝皇后傳祁氏○祁北史作惟綱目亦作惟

孝文昭皇后傳近龍城鎮○近監本誤達今從北史改

魏書卷十三考證